



**DON ALFONSO DE PRADO FERNÁNDEZ-CANTELI**, Secretario Xeral do Concello de Narón ( A Coruña)

**CERTIFICA:** Que o Concello Pleno, na sesión extra que tivo lugar o día 18 de novembro de 2008, adoptou entroutros, o acordo seguinte: "**5-PROPOSTA SOBRE PROTOCOLO DE COLABORACIÓN ENTRE O SERVIZO GALEGO DE SAÚDE E O CONCELLO DE NARÓN PARA A EXECUCIÓN DAS OBRAS DE CONSTRUCCIÓN DUN NOVO CENTRO DE SAÚDE.**"- Lida polo Secretario Xeral a proposta que di así: Visto o texto do protocolo sinalado no encabezamento desta proposta.

Considerando os acordos adoptados polo Pleno municipal deste Concello de Narón, nos que se sinala a necesidade de executar un único centro de saúde, novo, que veña a solventar e dar satisfacción ás necesidades dos vecinos/as de Narón.

Visto o ditame favorable por maioría (coas abstencións dos representantes do PP e do BNG (3 + 2 votos) e a favor dos membros de TEGA e do PSdeG-PSOE (5 + 1) da Comisión Informativa de Obras, Urbanismo e Servizos do 15 de decembro dos correntes, o seu Presidente propón ao Pleno a adopción dos seguintes acordos:

PRIMEIRO.- Prestar aprobación ao texto do PROTOCOLO DE COLABORACIÓN ENTRE O SERVIZO GALEGO DE SAÚDE E O CONCELLO DE NARÓN PARA A EXECUCIÓN DAS OBRAS DE CONSTRUCCIÓN DUN NOVO CENTRO DE SAÚDE, que acompaña a esta proposta como Anexo I, se ben se introducen ao seu texto as seguintes matizacións, que deben ser incorporadas so mesmo:

1º.- O SERGAS, tras a recepción da obra e a posta en funcionamento do novo centro de saúde, entregará libre de cargas e gravames e en debidas condicións de mantemento, o actual inmobile destinado a centro de saúde, sito no Alto do Castaño na localidade de Narón (rúa 25 de xullo), ASÍ COMO O MOBILIARIO DESE EDIFICIO EN IDÉNTICAS CONDICIÓNS XURÍDICAS E DE MANTEMENTO.

2º.- Deberá incluírse unha nova cláusula que recolla as aportacións municipais para os vindeiros exercizos económicos do xeito que segue:

ANO 2009:	100.000,00 EUROS
ANO 2010:	1.000.000,00 EUROS
ANO 2011:	1.600.000,00 EUROS

3º.- Se resultara necesario poderá prorrogarse o periodo de vixencia do convenio por acordo da ambalas dúas partes.

SEGUNDO.- Dar conta deste acordo á Intervención municipal de Fondos ao obxecto de efectuar as previsións orzamentarias que precisas resulten.

TERCEIRO.- Facultar ao Sr. Alcalde-Presidente do Concello de Narón para a sinatura do devandito Protocolo, así como para a realización e execución de calquera acto que preciso resulte para a efectividade destes acordos.

**VOTACIÓN E ACORDO.**- O Concello Pleno, por maioría con 7 abstencións ( 4 PP+3 BNG) e 13 votos a favor (3 Psde G-PSOE+ 10 TEGA) , aprobou a proposta transcrita.

*E para que conste e surta efectos esténdese a presente certificación, facéndolle constar que a acta onde se recolle o acordo anterior está pendente de aprobación, en Narón, o dezaioito de decembro de dous mil oito.*

V.e pr.

O ALCALDE

Asdo.- Juan Gato Díaz.



**PROTOCOLO DE COLABORACIÓN ENTRE O SERVIZO GALEGO DE SAÚDE E O  
CONCELLO DE NARÓN PARA A EXECUCIÓN DAS OBRAS DE CONSTRUCCIÓN  
DUN NOVO CENTRO DE SAÚDE.**

En Santiago de Compostela, de decembro de 2008

**REUNIDOS**

Dunha parte, a Sra. **D<sup>a</sup>. María José Rubio Vidal**, actuando en representación do Servizo Galego de Saúde da Xunta de Galicia, en virtude do seu cargo de Presidente e no exercicio das facultades que lle veñen atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, e no artigo 3 do Decreto 46/2006, do 23 de febreiro, polo que se establece a estrutura orgánica do Servizo Galego de Saúde, e de conformidade co establecido no acordo do Consello da Xunta de Galicia do 27 de marzo de 1991, publicado por Resolución da Consellería de Economía de Facenda de data 8 de abril de 1991 ( DOG núm. 82, do 30 de abril).

Doutra parte o Sr. **D. Juan Gato Díaz**, actuando en nome e representación do Concello do Narón, en virtude da súa condición de Alcalde - Presidente da citada Corporación, segundo o disposto no artigo 21 da Lei 7/1985, do 2 de abril, reguladora das bases de réxime local, 61.1 da Lei 5/1997, de administración local de Galicia e o artigo 41.1 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais.

As partes intervinientes recoñécense capacidade legal para outorgar o presente protocolo, e para iso,

## EXPOÑEN

Que a fin de dar unha mellor resposta aos problemas de saúde da colectividade, mediante unha máis rápida atención asistencial ao cidadán, faise necesario construír un novo centro de saúde no Concello de Narón.

Conscientes de dita necesidade as partes intervinientes acordan unir os seus esforzos para acadar o obxectivo sinalado. Por iso e a fin de levar adiante o proxecto das citadas obras de construción no Concello de referencia, é necesario a concorrencia de medios e achegas de ambas as dúas partes interesadas, polo que é preciso determinar o contido de dita cooperación.

Por todo isto, formalizan o presente protocolo de acordo coas seguintes

## CLÁUSULAS

**Primeira.-** O obxecto do presente Protocolo é establecer a colaboración entre o Concello de Narón e o Servizo Galego de Saúde para a construción dun novo centro de saúde no Concello de Narón.

**Segunda.-** O Concello de Narón obrígase a ceder a favor do Servizo Galego de Saúde, libre de cargas e gravames, unha parcela ordenada urbanisticamente para a construción dun novo centro de saúde, así como a obter os permisos e autorizacións que foran necesarios para executar as obras de construción do centro de saúde.

**Terceira.-** O Concello de Narón asumirá todos os gastos necesarios para dotar á parcela do centro de saúde das infraestruturas necesarias, tales como accesos rodados e peonís, abastecemento de auga, saneamento, subministración eléctrica, alumeados, telefonía, etc..., obrigándose a que estean totalmente executadas antes do inicio das obras polo Servizo Galego de Saúde.

**Cuarta.-** O Servizo Galego de Saúde comprométese á elaboración, e de ser o caso, á supervisión e á aprobación do proxecto técnico, así como a contratar, dirixir e executar as obras de construción do centro de saúde, con cargo aos seus orzamentos. Para tal fin, a Corporación deberá facilitarlle ao dito organismo, toda a documentación que sexa necesaria para a redacción do proxecto de obras (planos topográficos, información urbanística, características das infraestruturas existentes, así como o proxecto de urbanización).

**Quinta.-** Para a execución do presente Protocolo o Concello de Narón aportará ao longo dos tres exercicios seguintes e de acordo coas previsións orzamentarias oportunas, a contía de 2.700.000 € (dous millóns setecentos mil euros) con destino á execución das obras de construción do novo centro de saúde.

**Sexta.-** No suposto de producirse baixas na liquidación final, as mesmas repercutirán en ambas as dúas administracións asinantes deste Protocolo, en proporción á previa aportación que cada unha efectúe.

**Sétima.-** Tras a recepción da obra e posta en funcionamento do novo centro de saúde o Servizo Galego de Saúde entregará, libre de cargas e gravames e en debidas condicións de mantemento, o actual inmovible destinado a centro de saúde, sito no Alto do Castaño na localidade de Narón (rúa 25 de xullo), incluído o mobiliario de oficina.

**Oitava.-** Constituirase unha comisión de seguimento que interprete e asegure o bo fin e cumprimento do obxecto deste Protocolo así como que resolva as controversias xurdidas como consecuencia da execución deste.

A comisión estará formada por dous representantes de cada unha das partes, nomeados polos seus máximos responsables. A comisión reunirse por solicitude dunha das partes asinantes, considerándose constituída se asiste polo menos un dos representantes de cada entidade.

**Novena.-** O presente Protocolo entrará en vigor o día da súa sinatura e terá unha vixencia de tres anos, podendo ser prorrogado por mutuo acordo das partes asinantes antes da data da súa finalización, ata a consecución do seu obxectivo.

**Décima.-** O incumprimento de calquera das obrigas establecidas neste documento dará lugar á resolución do mesmo e no seu caso, a indemnización dos danos e perdas causados.

**Undécima.-** Este Protocolo ten carácter administrativo, quedando as partes que subscriben suxeitas á xurisdición contencioso- administrativa para a resolución de calquera conflito que puidese xurdir na aplicación deste.

Así queda redactado o presente Protocolo que, en proba de conformidade asinan os comparecentes, por duplicado exemplar no lugar e data indicados ao inicio.

**POLO SERVIZO GALEGO DE  
SAÚDE**

**POLO CONCELLO DE NARÓN**

**María José Rubio Vidal**

**Juan Gato Díaz**

## **ANEXO**

A cantidade de 2.700.000 euros (dous millóns setecentos mil euros) aportada polo Concello de Narón a efectos de execución do presente Protocolo, recollida na cláusula quinta do mesmo, distribuirase nos tres exercicios económicos vindeiros do xeito que segue:

Ano 2009: 100.000 € (cen mil euros).

Ano 2010: 1.000.000 € (un millón de euros).

Ano 2011: 1.600.000 € (un millón seiscentos mil euros).